

漢魏六朝百三家集

北魏

高令公
溫侍讀

第九十冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 90

古今集

高令公集

高令公集題詞

游廣平論高伯恭寬中似卓公洪量
似文饒風節似汲長孺予心慙之國
史刊石司徒獄興劔芒在前龍蛇莫
避惟有悟主以誠勿欺可免伯恭引
罪在身殆得樽酒納約之義加以儲

宮請命嚴君改顏應對獲全非無故
也崔公注詩論語尚書易閔湛郅櫟
稱其精微過于馬鄭王賈伯恭有左
氏公羊釋毛詩拾遺論雜解議何鄭
膏盲事百餘篇今俱不傳崔族銷滅
言論宜廢高令公寵周五帝年享百

齡而談經之書不與墓石同永子孫
典守聿修安在徵士頌感逝懷人三
十有四紵縞弦韋紛集於懷答宗著
作詩表丹歲寒能言其志觀彼生平
求友分深愛敬終始不獨於君臣有
情也集中文字如上書東宮諫起宮

室矯頽俗五異及樂平王著論皆耿
介有聲餘亦整而不污漢初張丞相
耆壽吉祥事畧彷彿惜年代久遠筆
札絕少有愧伯恭試列之北朝文苑
雖遜步崔公而開疆邢魏固當日之
先正也

婁東張溥題

高令公集目錄

賦

鹿苑賦

表

進天文要畧表

郡國建學表

疏

矯頽俗疏

諫起宮室疏

上書

諫東宮上書

書

答宗欽書

頌

北伐頌

徵士頌

有序

論

著論

訓

酒訓 有序

祭文

祭岱宗文

詩

羅敷行

王子喬

答宗欽十三章

詠貞婦彭城劉氏八章

附錄

本傳

高令公集目錄終

高令公集卷全

魏渤海高允伯恭著

明太倉張溥評閱

賦

鹿苑賦

啓重基於朔土，系軒轅之洪裔。武承天以作主，熙大明以御世。灑靈液以滂沱，扇仁風以遐被。踵姬文而築苑，包山澤以開制。植群物以充務，蠲四民之常稅。暨我皇之繼統，誕天縱之明獻。

追鹿埜之在昔、與三轉之高義、振幽宗於已永、
曠千載而可寄、於是命匠選工、刊茲西嶺、注誠
端思、仰模神影、庶真容之髣髴、耀金暉之煥炳、
卽靈岨以構宇、竦百尋而直正、絙飛梁於浮柱、
列荷華於綺井、圖之以萬形、綴之以清永、若祇
洄之瞪對、孰道場之塗迴、嗟神功之所建、超終
古而秀出、寔靈祇之協贊、故存貞而保吉、鑿仙
窟以居禪、闢重階以通術、澄清氣於高軒、佇流
芳於王室、茂花樹以芬敷、涌醴泉之洋溢、祈龍

宮以降雨，俾膏液於星畢。若乃研道之倫，行業
貞簡，慕德懷風，杖策來踐。守應貞之重禁，味三
藏之淵典。或步林以經行，或寂坐而端宴。會衆
善以並臻，排五難而俱遣。道欲隱而彌彰，名欲
毀而逾顯。伊皇輿之所幸，每垂心於華園。樂在
茲之閑敞，作離宮以榮築。固爽塏以崇居，枕平
原之高陸。恬仁智之所懷，眷山水以肆目。玩藻
林以遊思，絕鷹犬之馳逐。眷耆年以廣德，縱生
生以延福。慧愛內隆，金聲外發。功濟普天，善不

自伐尚諮賢以問道、詢芻蕘以補闕、盡敬恭於
靈寺、遵晦望而致謁、奉請戒以畢日、兼六時而
宵月、何精誠之至到、良九劫之可越、資聖王之
遠圖、豈循常以明教、希縉雲之上升、羨頂生之
高蹈、思離塵以邁俗、涉玄門之幽奧、禪儲宮以
正位、受太上之尊號、既存無而御有、亦執靜以
鎮躁、覩天規於今日、尋先哲之遺誥、悟二乾之
重蔭、審明離之並照、下甯濟於兆民、上尅光於
七廟、一萬國以從風、總羣生而爲導、正南面以

無爲永措心於冲妙夫道化之難期幸微躬之
遭遇逢扶桑之初開邁長夜之始曙顧衰年以
懷傷惟負忝以危懼敢布心以陳誠效鄙言以
自著

自昔

劉琨并其時以武職頗著去以勳歸於國言及
聖德參州桑之臨陣也其時之清淑而進事以
無恙不謂也然其時之聖德也其時之聖德也

表

進天文要略表

往年被勅令臣集天文災異使事類相從約而可觀臣聞箕子陳謨而洪範作宣尼述史而春秋著皆所以章名列辟景測皇天者也故先其善惡而驗以災異隨其失得而效以禍福天人誠遠而報速如響甚可懼也自古帝王莫不尊崇其道而稽其法數以自修飾厥後史官並載其事以爲鑒誠漢成時光祿大夫劉向見漢祚

將危權歸外戚。屢陳妖青而不見納。遂因洪範
春秋災異報應者而爲其傳。覬以感悟人主。而
終不聽察。卒以危亡。豈不哀哉。伏惟陛下神武
則天。叡鑒自遠。欽若稽古。率由舊章。前言往行。
靡不究鑒。前皇所不逮也。臣學不洽聞。識見寡
薄。懼無以裨廣聖聽。仰酬明旨。今謹依洪範傳
天文志撮其事要。略其文辭。凡爲八篇。

郡國建學表

臣聞經綸大業。必以教養爲先。咸秩九疇。亦由

文德成務，故辟雍光於周詩，泮宮顯於魯頌。自
永嘉以來，舊章殄滅，鄉閭蕪沒，雅頌之聲京邑
杜絕，釋奠之禮道業陵夷。百五十載，仰惟先朝
每欲憲章昔典，經闡素風，方事尚殷，弗遑克復。
陛下欽明文思，纂成洪烈，萬國咸甯，百揆時叙。
申祖宗之遺志，興周禮之絕業，爰發德音，惟新
文教，搢紳黎獻，莫不幸甚。臣承旨勅，並集二省，
披覽史籍，備究典紀，靡不敦儒以勸其業，貴學
以篤其道。伏思明詔，玄同古義，宜如聖旨，崇建

學校以厲風俗使先主之道光演於明時郁郁之音流聞於四海請制大郡立博士二人助教四人學生一百人次郡立博士二人助教二人學生八十人中郡立博士一人助教二人學生六十人下郡立博士一人助教一人學生四十人其博士取博通經典世履忠清堪爲人師者年限四十以上助教亦與博士同年限三十以上若道業夙成才任教授不拘年齒學生取郡中清望人行修謹堪循名教者先盡高門次及

中第

高令公集

卷全

表

七

疏

矯頽俗疏

前朝之世，屢發明詔，禁諸婚娶不得作樂，及葬送之日，歌謠鼓舞，殺牲燒葬，一切禁斷，雖條旨久頒，而俗不革變，將由居上者未能悛改，爲下者習以成俗，教化陵遲，一至於斯。昔周文以百里之地，修德布政，先于寡妻，及於兄弟，以至家邦，三分天下，而有其二，明爲政者先自近始。詩云：爾之教矣。民胥効矣。人君舉動，不可不慎，禮

云嫁女之家。三日不息燭。娶婦之家。三日不舉樂。今諸王納室。皆樂部給伎。以爲嬉戲。而獨禁細民。不得作樂。此一異也。古之婚者。皆揀擇德義之門。妙選貞閑之女。先之以媒娉。繼之以禮物。集寮友以重其別。親御輪以崇其敬。婚姻之際。如此之難。今諸王十五。便賜妻。別居。然所配者。或長少差舛。或罪入掖庭。而作合宗王。妃嬪藩懿。失禮之甚。無復此過。往年及今。頻有檢劾。誠是諸王過酒致責。跡其元起。亦由色衰相棄。

致此紛紜。今皇子娶妻。多出宮掖。令天下小民必依禮限。此二異也。萬物之生。靡不有死。古先哲王。作爲禮制。所以養生送死。折諸人情。若毀生以奉死。則聖人所禁也。然葬者藏也。死者不可再見。故深藏之。昔堯葬穀林。農不易畝。舜葬蒼梧。市不改肆。秦始皇作爲地市。下錮三泉。金玉寶貨。不可計數。死不旋踵。尸焚墓掘。由此推之。堯舜之儉。始皇之奢。是非可見。今國家營葬。費捐巨億。一旦焚之。以爲灰燼。苟靡費有益於

亡者。古之人奚獨不然。今上爲之不輟。而禁下
民之必止。此三異也。古者祭必立尸。序其昭穆。
使亡者有憑。致食饗之禮。今已葬之。竟人直求
貌類者。事之如父母。燕好如夫妻。損敗風化。瀆
亂情禮。莫此之甚。上未禁之。下不改絕。此四異
也。夫饗者所以定禮儀。訓萬國。故聖王重之。至
乃爵盈而不飲。肴乾而不食。樂非雅聲。則不奏。
物非正色。則不列。今之大會。內外相混。酒醉喧
譟。罔有儀式。又俳優鄙藝。污辱視聽。朝廷積習。

以爲美而責風俗之清純。此五異也。今陛下當百王之末，踵晉亂之弊，而不矯然釐改，以厲頽俗。臣恐天下蒼生，永不聞見禮教矣。

諫起宮室疏

臣聞太祖道武皇帝既定天下，始建都邑，其所營立，非因農隙，不有所興。今建國已久，宮室已備，永安前殿足以朝會萬國，西堂温室足以安御聖躬。紫樓臨望，可以觀望遠近。若廣修壯麗，爲異觀者，宜漸致之，不可倉卒。計斫材運土及

諸雜役須二萬人，丁夫充作，老小供餉，合四萬人，半年可訖。古人有言：一夫不耕，或受其饑；一婦不織，或受其寒。況數萬之衆，其所損廢亦以多矣。推之於古，驗之於今，必然之效也。誠聖主所宜思量。

上書

諫東宮上書

天地無私，故能覆載。王者無私，故能包養。昔之
明王，以至公宰物，故藏金於山，藏珠於淵，示天
下以無私。訓天下以至儉，故美聲盈溢，千載不
衰。今殿下國之儲貳，四海屬心。言行舉動，萬方
所則。而營立私田，畜養雞犬，乃至販酤市鄽，與
民爭利。議聲流布，不可追掩。夫天下者，殿下之
天下，富有四海，何求而不獲，何欲而弗從，而與

販夫販婦競此尺寸。昔號之將亡。神乃下降。賜之土田。卒喪其國。漢之靈帝。不修人君之重。好與宮人列肆販賣。私立府藏。以營小利。卒有顛覆傾亂之禍。前鑒若此。甚可畏懼。夫爲人君者。必審於擇人。故稱知人則哲。惟帝難之。商書云。無邇小人。孔父有云。小人近之。則不遜。遠之。則怨矣。武王愛周。召齊畢。所以王天下。殷紂愛飛廉惡來。所以喪其國。歷觀古今存亡之際。莫不由之。今東宮誠曰乏人。雋乂不少。頃來侍御左。

右者恐非在朝之選故願陛下少察愚言斥出
佞邪親近忠良所在田園分給貧下畜產販賣
以時收散如此則休聲日至謗議可除。

書

答宗欽書

頃因行李承足下高問延佇之勞爲日久矣王途一啓得叙其懷欣於相遇情無有已足下兼愛爲心每能存顧養之以風味惠之以德音執翫反覆銘於心抱吾少乏尋常之操長無老成之致憑賴賢聖以自充勉而來喻褒飾有過其分旣承雅贈卽應有答但唱高則難和理深則難酬所以留連日月以至於今今往詩一篇誠

不足標明來旨、且表以心、幸恕其鄙、滯領其至、
意、

卷八拾遺

公

北伐頌

皇矣上天，降鑒惟德。眷命有魏，照臨萬國。禮化
丕融，王猷允塞。靜亂以威，穆民以則。北虜舊隸，
稟政在蕃。往因時亂，逃命北轅。世襲凶軌，背忠
食言。招亡聚盜，醜類實繁。敢率犬羊，圖縱猖蹶。
乃詔訓師，興戈北伐。躍馬裹糧，星馳電發。撲討
虔劉，肆陳斧鉞。斧鉞暫陳，馘翦厥旅。積骸填谷，
流血成浦。元兇狐奔，假息窮墅。爪牙旣摧，腹心

亦阻周之忠厚存及行葦翼翼聖明有兼斯美
澤被京觀垂此仁旨封尸埜獲惠加生死生死
蒙惠人欣覆育理貫幽冥澤漸殊域物歸其誠
神獻其福遐邇斯懷無思不服古稱善兵歷時
始捷今也用師辰不及浹六軍克合萬邦以協
義著春秋功銘玉牒載興頌聲播之來葉

徵士頌

有序

昔歲同徵零落將盡感逝懷人作徵士頌蓋
止於應命者其有命而不至則闕焉群賢之

行舉其梗槩矣。今著之於左。

夫百王之御士也，莫不資仗群才，以隆治道。故周文以多士克甯，漢武以得賢爲盛。此載藉之所記，由來之常義。魏自神廡以後，宇內平定，誅赫連，積世之僭，掃窮髮不羈之寇，南摧江楚，西盪涼域，殊方之外，慕義而至。於是偃兵息甲，修立文學，登延儁造，酬諮政事，夢想賢哲，思遇其人。訪諸有司，以求名士，咸稱范陽盧玄等四十人，皆冠冕之胄，著問州邦，有羽儀之用。親發

明詔以徵立等，乃曠官以待之，懸爵以縻之，其就命三十五人，自餘依例州郡所遣者不可稱記。爾乃髦士盈朝，而濟濟之美興焉。昔與之俱蒙斯舉，或從容廊廟，或游集私門，上談公務，下盡忻娛，以爲千載一時，始於此矣。日月推移，吉凶代謝，同徵之人，凋殲殆盡，在者數子，然復分張，往昔之忻，變爲悲感。張仲業東臨營州，遲其還返，一敘于懷，齊矜於垂歿之年，寫情於桑榆之末。其人不幸，復至殞歿，在朝者皆後進之士。

解顏之地，顧省形骸，所以永歎而不已。夫頌者，美盛德之形容，亦可以長言寄意，不爲文二十年矣。然事切於心，豈可默乎？遂爲之頌。詞曰：

紫氣干霄，群雄亂夏。王龔徂征，戎車屢駕。掃盪遊氛，克剪妖霸。四海從風，八垠漸化。政教無外，旣甯且一。偃武橐兵，唯文是恤。帝乃旁求，搜賢舉逸。巖隱投竿，異人並出。疊疊盧生，量遠思純。鑽道據德，遊藝依仁。旌弓旣招，釋褐投巾。攝齊

升堂嘉謀日陳，自東徂南，躍馬馳輪，僭憑影附。
劉以和親，茂祖煢單，夙罹不造，克已勉躬，聿隆
家道，敦心六經，遊思文藻，終辭寵命，以之自保。
燕常篤信，百行靡遺，位不苟進，任理栖遲，居冲
守約，好讓善推，思賢樂古，如渴如饑，子翼致遠，
道賜悟深，相期以義，相和若琴，並參幕府，俱發
德音，優游卒歲，聊以寄心，祖根運會，克光厥猷，
仰緣朝恩，俯因德友，功雖後建，祿實先受，班同
舊臣，位並群后，士衡孤立，內省靡疚，言不崇華，

交不遺舊以產則貧論道則富所謂伊人實邦
之秀卓矣友規秉茲淑量存彼大方擯此細讓
神與理冥形隨流浪雖屈王侯莫廢其尚趙實
名區世多奇士山嶽所鍾挺生三李矯矯清風
抑抑容止初九而潛望雲而起詵尹西都靈惟
作傳垂訓皇宮載理雲霧熙雖中天迹階郎署
餘塵可挹終亦顯著仲業淵長雅性清到憲章
古式綢繆典誥時值險難常一其操納衆以仁
訓下以孝化被龍川民歸其教邁則英賢侃亦

稱選聞達邦家，名行素顯，志在兼濟，豈伊獨善。
繩匠弗顧，功不獲展。劉許履忠，竭力致躬，出能
騁說，八獻其功。輜軒一舉，撓燕下崇，名彰魏世，
享業亦隆。道茂夙成，弱冠播名，與朋以信，行物
以誠。怡怡昆弟，穆穆家庭，發響九臯，翰飛紫冥。
頻在省闈，亦司於京，刑以之中，政以之平。猗歟
彥鑒，思參文雅，率性任真，器成非假。靡矜于高，
莫恥于下，乃謝朱門，歸迹林埜。宗敬延譽，號爲
四儁，華藻雲飛，金聲夙振。中遇沈疴，賦詩以訊。

思、曩、方、爾、理、出、於、韻、高、澹、朗、達、默、識、淵、通、領、新、
悟、異、發、自、心、胸、質、侔、和、璧、文、炳、雕、龍、燿、姿、天、邑、
衣、錦、舊、邦、士、元、先、覺、介、焉、不、惑、振、袂、來、庭、始、賓、
王、國、蹈、方、履、正、好、是、繩、墨、淑、人、君、子、其、儀、不、忒、
孔、稱、游、夏、漢、美、淵、雲、越、哉、伯、度、出、類、踰、群、司、言、
祕、閣、作、牧、河、汾、移、風、易、俗、理、亂、解、紛、融、彼、滯、義、
渙、此、潛、文、儒、道、以、析、九、流、以、分、崔、宋、二、賢、誕、性、
英、偉、擢、穎、閭、閭、聞、名、象、魏、蹇、蹇、儀、形、邈、邈、風、氣、
達、而、不、矜、素、而、能、賁、潘、符、標、尚、杜、熙、好、和、清、不、

高公集 卷八 二
潔流、渾不同波、絕希龍津、止分常科、幽而逾顯、
損而逾多、張綱柔謙、叔術正直、道雅洽聞、弼爲
兼識、拔萃衡門、俱漸鴻翼、發憤忘餐、豈要斗食、
率禮從仁、罔愆于式、失不繫心、得不形色、郎苗
始舉、用均已試、智足周身、言足爲治、性協於時、
情敏於事、與今而同、與古曷異、物以利移、人以
酒昏、侯生潔已、唯義是敦、日縱醇醪、逾敬逾溫、
其在私室、如涉公門、季才之性、柔而執競、屈彼
南秦、申威致命、誘之以權、矯之以正、帝道用光、

邊士納慶群賢，遭世顯名。有代志竭，其忠才盡。
其槩體襲朱裳，腰紐雙佩。榮曜當時，風高千載。
君臣相遇，理實難偕。昔因朝命，與之克諧。披衿
散想，解帶舒懷。此听如昨，存亡奄乖。靜言思之，
中心九摧。揮毫頌德，潛爾增哀。

論

著論

劉縹常謂私人曰。若車駕不還。吾當立樂平王。及縹誅王。以憂死。日者董道秀亦誅。允著著論。

昔明元末起白臺。其高二十餘丈。樂平王嘗夢登其上。四望無所見。王以問日者董道秀。筮之曰大吉。王默而有喜色。後事發。王遂憂死。而道秀棄市。道秀若推六爻以對王。曰。易稱亢龍有悔。窮高曰亢。高而無民。不爲善也。夫如是。則上

高令公集

卷八

論

亢

甯於王。下保於已。福祿方至。豈有禍哉。今舍於
本而從其末。咎釁之至。不亦宜乎。

訓

酒訓

臣被勅論集往世酒之敗德、以爲酒訓、臣以朽邁、遭人倫所棄、而殊恩過隆、錄臣於將歿之年、勗臣於已墜之地、奉命驚惶、喜懼兼甚、不知何事、可以上答、伏惟陛下、以獻哲之姿、撫臨萬國、太皇太后、以聖德之廣、濟育群生、普天之下、罔不稱賴、然日昃憂勤、虛求不已、思監往事、以爲警戒、此之至誠、悟通百靈、而況於百官士民、不

勝踴躍、謹竭其所見、作酒訓一篇、但臣愚短、加以荒廢、辭義鄙拙、不足觀採、伏願聖慈、體臣慙慙之情、恕臣狂瞽之意、其詞曰、

自古聖王、其爲饗也、立酒在堂、而醕酒在下、所以崇本重原、降於滋味、雖汎爵旅行、不及於亂、故能禮章而敬不虧、事畢而儀不忒、非由斯致、是失其道、將何以範時軌物、垂之於世、厯觀往代成敗之效、吉凶由人、不在數也、商辛耽酒、殷道以之亡、公旦陳誥、周德以之昌、子反昏酣而

致斃穆生不飲而身光或長世而爲戒或百代而流芳酒之爲狀變惑情性雖曰哲人孰能自競在官者殆於政也爲下者慢於令也聰達之士荒於聽也柔順之倫興於諍也久而不悛致於病也豈止於病乃損其命諺亦有云其益如毫其損如刀言所益者止於一味之益不亦寡乎言所損者天年亂志天亂之損不亦夥乎無以酒荒而陷其身無以酒狂而喪其倫迷邦失道流浪漂津不師不遵反將何因詩不言乎如

切如磋、如琢如磨、朋友之義也、作官以箴之、申謨以禁之、君臣之道也、其言也善、則三覆而佩之、言之不善、則哀矜而貸之、此實先王納規之意、往者有晉士多失度、肆散誕以爲不羈、縱長酣以爲高達、調酒之頌、以相眩曜、稱堯舜有千鍾百觚之飲、著非法之言、引大聖爲譬、以則天之明、豈其然乎、且子思有云、夫子之飲、不能一升、以此推之、千鍾百觚、皆爲妄也、今大魏應圖重明、御世化之所暨、無思不服、仁風敦洽於四

海太皇太后以至德之隆誨而不倦憂勤備於
皇情誥訓行於無外故能道協兩儀功同覆載
仁恩下逮罔有不遵普天率土靡不蒙賴在朝
之士有志之人宜克已從善履正存貞節酒以
爲度順德以爲經悟昏飲之美疾審敬慎之彌
榮遵孝道以致養顯父母而揚名蹈閔曾之前
軌遺仁風於後生仰以答所授俯以保其成可
不勉歟可不勉歟

祭文

祭岱宗文

維皇興二年敢昭告於岱宗之靈正趾坤元作
鎮東夏齊二儀以永固崇至德以配天故能資
元氣以造物協陰陽而變化若其崑嶺峭峙川
谷幽深神怪譎詭倏忽百靈吐納風雲育成萬
品攝生之所歸焉禎祥之所萃焉是以歷代帝
王之崇封禪銘功以告其成七十二君咸在茲
焉自非功侔造化應同自然孰能若此者哉自

我國家肅恭禋祀，懷柔百神，邦域之內，罔不咸
秩，往以天路未夷，雖望祭有在，今大化既同，奄
有淮岱，謹薦於嶽宗之靈，尚饗。

詩

羅敷行

邑中有好女，姓秦自羅敷。巧笑美回盼，鬢髮復凝膚。脚著花文履，耳穿明月珠。頭作墮馬髻，倒枕象牙梳。娉娉善趨步，檐檐曳長裾。王侯爲之顧，駟馬自踟蹰。

王子喬

王少卿，王少卿，超升飛龍翔天庭。遺儀景雲漢，酬光驚電逝。忽若浮騎日月從，列星跨騰八廓。

踰杳冥，尋元氣，出天門，窮覽有無究道根。

答宗欽十三首

湯湯流漢，藹藹南都，載稱多士，載耀靈珠，邈矣高族，世記丹圖，啓基郢城，振彩涼區。

吾生朗到，誕發英風，紹熙前緒，奕世克隆，方圓備體，淑德斯融，望傾群雋，響駭華戎。

響駭伊何，金聲名著，匡贊西藩，拯厥時務，肅志琴書，恬心初素，潛思淵渟，秀藻雲布。

上天降命，祚鍾有代，協耀紫宸，與乾作配，仁邁

春陽功隆。覆載招延。隱叟永貽大賚。

伊余櫟散。才至庸微。遭緣幸會。忝與樞機。竊名

華省。廁足丹墀。愧無螢燭。少益天暉。

明外非諭。信漸難兼。體卑處下。豈曰能謙。進不

弘道。退失淵潛。旣慚朱闕。亦愧閭閻。

史班稱達。楊蔡致深。負荷典策。載蹈於心。四轍

同軌。覆車相尋。敬承嘉誨。永佩明箴。

遠思古賢。內尋諸已。仰謝邱明。長揖南史。遐武

雖存。高蹤難擬。夙興夕惕。豈獲恬止。

世之圯矣。靈運未通。風馬殊隔。區域異封。有懷
西望。路險莫從。王澤遠灑。九服來同。
在昔平吳。二陸稱寶。今也尅遼。吾生獨矯。道映
儒林。義爲群表。我思與之。均於紵綯。
仁乏田蘇。量非叔度。韓生屬降。林宗仍顧。千載
曠遊。邁茲一遇。藻詠風流。鄙心已悟。
年時迅邁。物我俱逝。任之斯通。擁之則滯。結駟
貽塵。屢空亦敝。兩間可守。安有回賜。
詩以言志。志以表丹。慨哉刎頸。義已中殘。雖曰

不敏請事金蘭爾其勵之無忘歲寒

詠貞婦彭城劉氏八章

兩儀正位人倫肇甄爰制夫婦統業承先雖曰
異族氣猶自然生則同室終契黃泉

封生令達卓爲時彥內協黃中外兼三變誰能
作配克應其選寔有華宗挺生淑媛

京野勢殊山川垂互乃奉王命載馳在路公務
旣弘私義獲著因媒致幣邁止一暮

率我初冠眷彼弱笄形由禮比情以趣諧忻願

難常、影跡易乖、悠悠言邁、戚戚長懷、

時值險屯、橫離塵網、伏鑽就刑、身分土壤、千里
雖遐、應如影響、良嬪洞感、發於夢想、

仰惟親命、俯尋嘉好、誰謂會淺、義深情到、畢志
守窮、誓不二醮、何以驗之、殞身是效、

人之處世、孰不厚生、心存於義、所重則輕、結憤
鍾心甘就、幽冥永捐、堂宇長辭、母兄、

茫茫中野、翳翳孤邱、葛藟冥蒙、荊棘四周、理苟
不昧、神必俱游、異哉貞婦、曠世靡儔、

渤海封卓妻劉氏彭城人成婚一夕卓
官於京師以事見法劉氏在家忽形夢
想知卓已死哀泣不止經旬凶問果至
遂憤歎而終時人比之秦嘉妻云高允
念其義高而名
不著乃爲之詩。

高令公集

卷全

三

本傳

高允字伯恭，渤海人也。祖泰在叔父湖傳，父韜少以英朗知名，同郡封懿雅相敬慕，爲慕容垂太尉從事中郎。太祖平中山，以韜爲丞相參軍。早卒，允少孤，夙成，有奇度。清河崔玄伯見而異之，歎曰：「高子黃中內潤，文明外昭，必爲一代偉器。但恐吾不見耳。」年十餘，奉祖父喪還本郡，推財與二弟，而爲沙門，名法淨。未久而罷，性好文學，擔笈負書，千里就業，博通經史、天文、術數。尤

好春秋公羊。郡召功曹。神麤三年。世祖舅陽平王杜超行征南大將軍。鎮鄴。以允爲從事中郎。年四十餘矣。超以方春而諸州囚多不決。乃表允與中郎呂熙等分詣諸州。共評獄事。熙等皆以貪穢得罪。唯允以清平獲賞。府解還家。教授受業者千餘人。四年。與盧立等俱被徵。拜中書博士。遷侍郎。與太原張偉並以本官領衛大將軍。樂安王範從事中郎。範。世祖之寵弟。西鎮長安。允甚有匡益。秦人稱之。尋被徵還。允曾作塞。

上翁詩有混欣戚遺得喪之致驃騎大將軍樂平王丕西討上邽復以本官參丕軍事語在不傳涼州平以參謀之勲賜爵汶陽子加建武將軍後詔允與司徒崔浩述成國記以本官領著作郎時浩集諸術士考校漢元以來日月薄蝕五星行度并識前史之失別爲魏厯以示允允曰天文厯數不可空論夫善言遠者必先驗於近且漢元年冬十月五星聚於東井此乃厯術之殘今譏漢史而不覺此謬恐後人譏今猶今

之譏古。浩曰。所謬云何。允曰。案星傳。金水二星。常附日而行。冬十月日在尾箕。昏沒於申南。而東井方出於寅北。二星何因背日而行。是史官欲神其事。不復推之於理。浩曰。欲爲變者何所。不可。君獨不疑三星之聚。而怪二星之來。允曰。此不可以空言爭。宜更審之。時坐者咸怪。唯東宮少傅游雅曰。高君長於厯數。當不虛也。後歲餘。浩謂允曰。先所論者。本不注心。及更考究。果如君語。以前三月聚於東井。非十月也。又謂雅

曰高允之術陽元之射也衆乃歎服允雖明於
歷數初不推步有所論說唯游雅數以災異問
允允曰昔人有言知之甚難既知復恐漏泄不
如不知也天下妙理至多何遽問此雅乃止尋
以本官爲秦王翰傳後勅以經授恭宗甚見禮
待又詔允與侍郎公孫質李虛胡方回共定律
令世祖引允與論刑政言甚稱旨因問允曰萬
機之務何者爲先是時多禁封良田又京師遊
食者衆允因言曰臣少也賤所知唯田請言農

事古人云方一里則爲田三頃七十畝。百里則田三萬七千頃。若勤之則畝益三升。不勤則畝損三升。方百里損益之率。爲粟二百二十二萬斛。況以天下之廣乎。若公私有儲。雖遇饑年。復何憂哉。世祖善之。遂除田禁。悉以授民。初崔浩薦冀定相。幽并五州之士數十人。各起家郡守。恭宗謂浩曰。先召之人。亦州郡選也。在職已久。勤勞未答。今可先補前召外任郡縣。以新召者代爲郎吏。又守令宰民。宜使更事者。浩固爭而

遣之允聞之謂東宮博士管恬曰崔公其不免乎苟逞其非而校勝於上何以勝濟遼東公翟黑子有寵於世祖奉使并州受布千疋事尋發覺黑子請計於允曰主上問我爲首爲諱乎允曰公帷幄寵臣答詔宜實又自告忠誠罪必無慮中書侍郎崔覽公孫質等咸言首實罪不可測宜諱之黑子以覽等爲親已而反怒允曰如君言誘我死何其不直遂與允絕黑子不以實對竟爲世祖所疎終獲罪戮是時著作令史閔

湛邠櫟性巧佞，爲浩信待。見浩所注詩論語尚書易，遂上疏言馬鄭王賈雖注述六經，並多疏謬，不如浩之精微。乞收境內諸書藏之祕府。班浩所注，命天下習業，并求勅浩注禮傳。令後生得觀正義。浩亦表薦湛有著述之才。旣而勸浩刊所撰國史於石，用垂不朽。欲以彰浩直筆之跡。允聞之，謂著作鄭崇欽曰：閔湛所營分寸之間，恐爲崔門萬世之禍。吾徒無類矣。未幾而難作。初，浩之被收也，允直中書省。恭宗使東宮侍

耶吳延召允仍留宿宮內翌日恭宗入奏世祖
命允驂乘至宮門謂曰入當見至尊吾自導卿
脫至尊有問但依吾語允請曰爲何等事也恭
宗曰入自知之旣入見帝恭宗曰中書侍郎高
允自在臣宮同處累年小心密慎臣所委悉雖
與浩同事然允微賤制由於浩請赦其命世祖
召允謂曰國書皆崔浩作不允對曰太祖記前
著作郎鄧淵所撰先帝記及今記臣與浩同作
然浩綜務處多總裁而已至於注疏臣多於浩

世祖大怒曰、此甚於浩、安有生路、恭宗曰、天威嚴重、允是小臣、逃亂失次耳、臣向備問、皆云浩作、世祖問如東宮言不、允曰、臣以下才、謬參著作、犯逆天威、罪應滅族、今已分死、不敢虛妄、殿下以臣侍講日久、哀臣乞命耳、實不問臣、臣無此言、臣以實對、不敢逃亂、世祖謂恭宗曰、直哉、此亦人情所難、而能臨死不移、不亦難乎、且對君以實、貞臣也、如此言、寧失一有罪、宜宥之、允竟得免、於是召浩前、使人詰浩、浩惶惑不能對、

允事事申明皆有條理時世祖怒甚勅允爲詔自浩已下僮吏已上百二十八人皆夷五族允持疑不爲頻詔催切允乞更一見然後爲詔詔引前允曰浩之所坐若更有餘釁非臣敢知直以犯觸罪不至死世祖怒命介士執允恭宗拜請世祖曰無此人忿朕當有數千口死矣浩竟族滅餘皆身死宗欽臨刑歎曰高允其殆聖乎恭宗後讓允曰人當知機不知機學復何益當爾之時吾導卿端緒何故不從人言怒帝如此

每一念之使人心悸。允曰。臣東野凡生。本無宦意。屬休延之會。應旌弓之舉。釋褐鳳池。仍參麟閣。尸素官榮。妨賢已久。夫史籍者。帝王之實錄。將來之炯戒。今之所以觀往。後之所以知今。是以言行舉動。莫不備載。故人君慎焉。然浩世受殊遇。榮曜當時。孤負聖恩。自貽灰滅。卽浩之跡。時有可論。浩以蓬蒿之才。荷棟梁之重。在朝無謬。謬之節。退私無委蛇之稱。私欲沒其公。庶愛憎蔽其直理。此浩之責也。至於書朝廷起居之

跡言國家得失之事此亦爲史之大體未爲多
違然臣與浩實同其事死生榮辱義無獨殊誠
荷殿下大造之慈違心苟免非臣之意恭宗動
容稱歎允後與人言我不奉東宮導旨者恐負
翟黑子恭宗季年頗親近左右營立田園以取
其利允諫恭宗不納恭宗之崩也允久不進見
後世祖召允升階歔歔悲不能止世祖流淚命
允使出左右莫知其故相謂曰高允無故悲泣
令至尊哀傷何也世祖聞之召而謂之曰汝不

知高允悲乎、左右曰、臣等見允無言而泣、陛下
爲之悲傷、是以竊言耳、世祖曰、崔浩誅時、允亦
應死、東宮苦諫、是以得免、今無東宮、允見朕因
悲耳、允表進天文志、撮其事要、略其文辭、凡爲
八篇、世祖覽而善之、曰、高允之明災異、亦豈減
崔浩乎、及高宗卽位、允頗有謀焉、司徒陸麗等
皆受重賞、允旣不蒙褒異、又終身不言、其忠而
不伐、皆此類也、給事中郭善明性多機巧、欲逞
其能、勸高宗大起宮室、允諫宜思量、高宗納之、

允以高宗纂承平之業而風俗仍舊婚娶喪葬
不依古式允諫稱五異高宗從容聽之或有觸
迂帝所不忍聞者命左右扶出事有不便允輒
求見高宗知允意逆屏左右以待之禮敬甚重
晨入暮出或積日居中朝臣莫知所論或有上
書陳得失者高宗省而謂群臣曰君父一也父
有是非子何爲不作書於人中諫之使人知惡
而於家內隱處也豈不以父親恐惡彰於外也
今國家善惡不能面陳而上表顯諫此豈不彰

君之短。明已之美。至如高允者。真忠臣矣。朕有
是非。常正言面論。至朕所不樂聞者。皆侃侃言
說。無所避就。朕聞其過。而天下不知其諫。豈不
忠乎。汝等在左右。曾不聞一正言。但伺朕喜時。
求官乞職。汝等把弓刀侍朕左右。徒立勞耳。皆
至公王。此人把筆匡我國家。不過作郎。汝等不
自愧乎。於是拜允中書令。著作如故。司徒陸麗
曰。高允雖蒙寵待。而家貧布衣。妻子不立。高宗
怒曰。何不先言。今見朕用之。方言其貧。是日幸

允第惟草屋數間，布被緼袍，厨中鹽菜而已。高宗歎息曰：「古人之清貧，豈有此乎？」卽賜帛五百匹，粟千斛，拜長子忱爲綏遠將軍、長樂太守。允頻表固讓，高宗不許。初，與允同徵，游雅等多至通官封侯，及允部下吏百數十人，亦至刺史二千石，而允爲郎二十七年，不徙官。時百官無祿，允常使諸子樵采自給。初，尚書竇瑾坐事誅，瑾子遵亡在山澤，遵母焦沒入縣官，後焦以老得免。瑾之親故莫有恤者，允愍焦年老，保護在家。

積六年。遵始蒙赦。其篤行如此。轉太常卿。本官如故。允上代都賦。因此規諷。亦二京之流也。文多不載。時中書博士索敞與侍郎傅默梁祚論名字貴賤。著議紛紜。允遂著名字論以釋其惑。甚有典證。復以本官領祕書監。解太常卿。進爵梁城侯。加左將軍。初允與游雅及太原張偉同業相友。雅嘗論允曰。夫喜怒者。有生所不能無也。而前史載卓公寬中。文饒洪量。褊心者或之弗信。余與高子遊處四十年矣。未嘗見其是非。

愠喜之色不亦信哉。高子內文明而外柔弱。其
言呐呐不能出口。余常呼爲文子。崔公謂余云。
高生豐才博學。一代佳士。所乏者矯矯風節耳。
余亦然之。司徒之譴。起於纖微。及於詔責。崔公
聲嘶股戰不能言。宗欽以下。伏地流汗。都無人
色。高子敷陳事理。申釋是非。辭義清辨。音韻高
亮。明主爲之動容。聽者無不稱善。仁及寮友。保
茲元吉。向之所謂矯矯者。更在斯乎。宗愛之任
勢也。威振四海。嘗召百司於都坐。王公以下。望

庭畢拜。高子獨升階長揖。由此觀之。汲長孺可
臥。見衛青。何抗禮之有。向之所謂風節者。得不
謂此乎。知人固不易。人亦不易知。吾旣失之於
心內。崔亦漏之於形外。鍾期止聽於伯牙。夷吾
見明於鮑叔。良有以也。其爲人物所推如此。高
宗重允。常不名之。恒呼爲令公。令公之號。播於
四遠矣。高宗崩。顯祖居諒闇。乙渾專擅朝命。謀
危社稷。文明太后誅之。引允禁中。參決大政。又
詔允曰。自頃以來。庠序不建。爲日久矣。道肆陵

遲。學業遂廢。子衿之歎。復見於今。朕旣纂統大業。八表晏甯。稽之舊典。欲置學宮於郡國。使進修之業。有所津寄。卿儒宗元老。朝望舊德。宜與中祕二省參議以聞。允表分別諸郡學。置師徒。有差。顯祖從之。郡國立學。自此始也。後允以老疾。頻上表乞骸骨。不許。於是著告老詩。又以昔歲同徵。零落將盡。感逝懷人。作徵士頌。皇興中。詔允兼太常。至兖州。祭孔子廟。謂允曰。此簡德而行。勿有辭也。後允從顯祖北伐。大捷而還。至

武川鎮。上北伐。頌顯祖覽而善之。又顯祖時有
不豫。以高祖冲幼。欲立京兆王子推。集諸大臣。
以次召問。允進跪上前。涕泣曰。臣不敢多言。以
勞神聽。願陛下上思宗廟。託付之重。追念周公。
抱成王之事。顯祖於是傳位於高祖。賜帛千匹。
以標忠亮。又遷中書監。加散騎常侍。雖久典史
事。然而不能專勤屬述。時與校書郎劉模有所
緝綴。大較續崔浩故事。準春秋之體。而時有刊
正。自高宗迄於顯祖。軍國書檄。多允文也。末年

乃薦高間以自代以定議之勲進爵咸陽公加
鎮東將軍尋授使持節散騎常侍征西將軍懷
州刺史允秋月巡境問民疾苦至邵縣見邵公
廟廢毀不立乃曰邵公之德闕而不禮爲善者
何望乃表聞修葺之允於時年將九十矣勸民
學業風化頗行然儒者優遊不以斷決爲事後
正光中中散大夫中書舍人河內常景追思允
帥郡中故老爲允立祠於野王之南樹碑紀德
焉太和二年又以老乞還鄉里十餘章上卒不

聽許，遂以疾告歸。其年詔以安車徵允，勅州郡發遣至都，拜鎮軍大將軍，領中書監，固辭不許。又扶引就內，改定皇誥。允又奉勅作酒訓。高祖悅之，常置左右。詔允乘車入殿，朝賀不拜。明年詔允議定律令，雖年漸期頤，而志識無損。猶心存舊職，披考史書。又詔曰：允年涉危境，而家貧養薄，可令樂部絃竹十人，五日一詣允，以娛其志。特賜允蜀牛一頭，四望蜀車一乘，素几杖各一，蜀刀一口。又賜珍味，每春秋常致之。尋詔朝

晡給膳朔望致牛酒衣服綿絹每月送給允皆分之親故。是時貴臣之門皆羅列顯官而允子弟皆無官爵。其廉退若此。遷尚書散騎常侍。時延入備几杖。問以政治。十年加光祿大夫金章紫綬。朝之大議皆咨訪焉。魏初法嚴。朝士多見杖罰。允厯事五帝。出入三省五十餘年。初無譴咎。初真君中以獄訟留滯。始令中書以經義斷諸疑事。允據律評刑。三十餘載。內外稱平。允以獄者民之命也。常歎曰。臯陶至德也。其後英彥

先亡。劉項之際。英布黥而王。經世雖久。猶有刑。之餘。釁况凡人能無咎乎。其年四月。有事西郊。詔以御馬車迎允。就郊所板殿觀矚。馬忽驚。奔車覆傷眉三處。高祖文明太后遣醫藥護治。存問相望。司駕將處重坐。允啟陳無恙。乞免其罪。先是命中黃門蘇興壽扶侍允。曾雪中遇犬驚倒。扶者大懼。允慰勉之。不令聞徹。興壽稱共允接事三年。未嘗見其忿色。恂恂善誘。誨人不倦。晝夜手常執書。吟詠尋覽。篤親念故。虛已存納。

雖處貴重。志同貧素。性好音樂。每至伶人弦歌。鼓舞常擊節稱善。又雅信佛道。時設齋講。好生惡殺。性又簡至。不妄交遊。顯祖平青齊。徙其族望於代。時諸士人流移遠至。率皆饑寒。徙人之中。多允姻媾。皆徒步造門。允散財竭產。以相贍賑。慰問周至。無不感其仁厚。收其才能。表奏申用。時議者皆以新附致異。允謂取材任能。無宜抑屈。先是允被召在方山。作頌志氣猶不多損。談說舊事了無所遺。十一年正月卒。年九十八。

初允每謂人曰，吾在中書時，有陰德濟救民命。若陽報不差。吾壽應享百年矣。先卒旬外，微有不適，猶不寢臥，呼醫請藥，出入行止，吟詠如常。高祖文明太后聞而遣醫李脩往脉視之，告以無恙。脩入密陳，允榮衛有異，懼其不久，於是遣使備賜御膳珍羞，自酒米至於鹽醢，百有餘品，皆盡時味。及牀帳衣服茵被几杖，羅列於庭。王官往還，慰問相屬。允喜形於色，語人曰：「天恩以我篤老，大有所資，得以贍客矣，表謝而已，不有。」

他慮如是數日夜中卒家人莫覺詔給絹一千匹布二千匹綿五百斤錦五十匹雜綵百匹穀千斛以周喪用魏初以來存亡蒙賚者莫及焉朝廷榮之將葬贈侍中司空公冀州刺史將軍公如故謚曰文賜命服一襲允所製詩賦誄頌箴論表讚左氏公羊釋毛詩拾遺論雜解議何鄭膏肓事凡百餘篇別有集行於世允明筭法爲筭術三卷子忱襲

史臣曰依仁遊藝執義守喆其司空高允乎蹈

危禍之機。抗雷電之氣。處死夷然。忘身濟物。卒
悟明主。保已全身。自非體隣知命。鑒照窮達。亦
何能以若此。宜其光寵四世。終享百齡。有魏以
來。斯人而已。僧裕學治有聞。聿脩之義也。

疏 卷之四

溫侍讀集

溫傳詩身是言

史言溫鵬舉外靜內險好預事故終
致禍敗今據史魏莊帝殺爾朱榮元
瑾等背齊文襄作亂鵬舉皆預謀此
二事者柔順文明志存討賊設令功
成無患不庶幾其先大將軍之誅王

敦乎魏書目爲深險佛助何無識也
鵬舉初困馬坊常公拂拭始稱才士
縛于葛榮和督脫之逃死入京貧薄
狼顧時恐不及上黨善怒幾遭鞭撻
後復賞愛捐其前忿徐紇小人亦畏
才藻不輕下筆溫生雖窮天下豈少

知已哉元顥之變策復京師計之上
也上黨卽不能爲桓文鵬舉之言管
狐許之矣北人不稱其多知而徒矜
斬將搴旗于文墨之間猶皮相也吐
谷小國畜書牀頭梁武知文嘆窮百
六濟陰寒士何以得此表碑具在頗

少絕作陵顏轢謝含任吐沈亦磽确
自雄北方語耳桐華引僊露槐影麗
卿烟鵬舉逸句尚佳世以其詩少卽
云不長于詩寒山片石當不其然

婁東張溥題

溫侍讀集目錄

詔

爲魏莊帝閭闔門赦詔

爲莊帝生皇太子赦詔

爲魏帝遷都拜廟鄴宮赦詔

敕

天平元年被命作答齊神武敕

表

魏帝納后群臣上禮文表

西河王謝太尉表

爲司徒高敖曹謝表

爲臨淮王謝開封府尚書令表

爲南陽王讓尚書表

爲上黨王穆讓太宰表

爲廣陵王讓吏部尚書表

爲安豐王延明讓國子祭酒表

爲廣陽王北征請大將表

上書

爲廣陽王淵上書

爲廣陽王淵上書靈太后

銘

鐘銘

碑

舜廟碑

寒陵山寺碑

大覺寺碑

印山寺碑

定國寺碑

常山公主碑

墓誌銘

司徒元樹墓誌銘

司徒祖塋墓誌

文

閭闔門上梁祝文

樂府

白鼻騮

結襪子

安定侯曲

燉煌樂

涼州樂歌二首

擣衣

詩

從駕幸金墉城

春日臨池

詠花蝶

相國清河王挽歌

附錄

本傳

溫侍讀集目錄終

溫侍讀集卷全

魏濟陰溫子昇鵬舉著

明太倉張溥天如閱

詔

爲魏莊帝閭闔門赦詔

蓋天道忌盈，人倫嫉惡，疎而不漏，刑之無捨，是以呂霍之門，禍譴所伏。梁董之家，咎徵斯在。頃孝昌之末，天步孔艱，女主亂政，監國無主，爾朱榮爰自晉陽，同憂王室，義旗之建，大會盟津，與

世樂推其成鴻業、論其始圖、非無勞效。但致遠
恐泥、終之實難。曾未崇朝、豺聲已露。河陰之役、
安忍無親。王公卿士、一朝塗地。宗戚靡遺、內外
俱盡。假弄天威、殆危神器。時事倉卒、未遑問臯、
尋以葛賊橫行、馬首南向、捨過責成、用平醜虜、
及元顥問鼎、大駕北巡、復致勤王、展力行所、以
此論功、且可補過。既位極宰衡、地踰齊魯、容養
之至、豈復是過。但心如猛火、山林無以供其暴、
意等漏卮、江河無以充其溢。既見金革稍甯、方

隅漸泰、不推天功、專爲己力、與奪任情、臧否肆
意、無君之跡、日月以甚、拔髮數罪、蓋不足稱、斬
竹書愆、豈云能盡、方復託名朝宗、陰圖釁逆、睥
睨天居、窺覷聖厯、乃有裂冠毀冕之心、將爲拔
本塞源之事、天旣厭亂、人亦悔禍、同惡之臣、密
來投告、將而必誅、罪無容捨、又立天穆宗室末
屬、名望素微、遭逢際會、頗參義舉、不能竭其忠
誠、以奉家國、乃復棄本逐末、背同即異、爲之謀
主、成彼禍心、是而可忍、孰不可恕、並以伏辜、自

貽伊戚、元惡旣除、人神慶泰、便可大赦天下、

爲莊帝生皇太子赦詔

有國三善、事屬元良、本枝百世、義鍾繼體、朕應
天纂命、握圖受籙、景祚維新、十年以永、今月吉
辰、皇子誕育、彩雲映日、神光照殿、方開博望、將
起龍樓、遠近同歡、人神共悅、便可大赦天下、

爲魏帝遷都拜廟鄴宮赦詔

建國所先、理屬於宗廟、立事爲大、禮歸於禋祀、
大丞相渤海王神武命世、重匡頽厯、導塞源於

將竭扶神器於已傾立天地之大功成人臣之
重義朕以冲昧猥當樂推關路多虞衿帶難固
瞻言往事取則前修乃襲去艷用追遷亳定鼎
鄴都卜世惟永民用子來功成不日今清廟初
興闕宮始就靈祇萃止祖考來格神光夜照香
氣朝聞今月吉辰躬展誠敬時和氣婉景麗雲
業四表來庭萬國在位哀樂相交感慶兼集固
宜觀象雷雨布寬大之恩取類澤風申肆眚之
令可大赦天下

五言古詩

五言古詩一首

五言古詩一首

五言古詩一首

五言古詩一首

五言古詩一首

五言古詩一首

五言古詩一首

五言古詩一首

勅

天平元年被命作答齊神武勅

高歡擁立魏孝武於洛陽、自歸鄴都、已
斛斯椿構帝、漸與歡隙、封隆之孫騰亡
奔、歡洩其謀、帝規欲討歡、假稱將伐、何
吳、且備宇文賀拔歡亦表稱勒兵四道
伏聽處分、仍申信誓云、爲嬖倖所間、一
旦賜疑、若負陛下、身受天殃、子孫殄絕、
一二佞臣、願斟量廢出、帝命舍人溫子
昇草勅答之、子昇逡巡未敢作、帝據胡
床拔劔作
色乃遣筆

前持心血、遠以示王、深冀彼此、其相體悉、而不
良之徒、坐生間貳、近孫騰倉卒向彼、致使間者

疑有異謀，故遣御史中尉綦雋，且申朕懷。今得王啓，言誓懇惻，反覆思之，猶所未解。以朕眇身，遇王武曌，不勞尺刃，坐爲天子，所謂生我者父母，貴我者高王。今若無事背王，規相攻討，則使身及子孫，還如王誓。皇天后土，實聞此言。近慮宇文爲亂，賀拔勝應之，故纂嚴欲與王俱爲聲援。宇文今日使者相望，觀其所爲，更無異迹。賀拔在南，開拓邊境，爲國立功，念無可責。君若欲分謗，何以爲辭？東南不賓，爲日已久，先朝以來，

置之度外。今天下戶口減半，未宜窮兵極武。朕
既闇昧，不知佞人是誰，可列其姓名，令朕知也。
如聞庫狄干語王云：本欲取懦弱者爲主。王無
事，立此長君，使其不可駕御。今但作十五日，行
自可廢之。更立餘者，如此議論，自是王間勲人，
豈出佞臣之口。去歲封隆之背叛，今年孫騰之
逃走，不臯不送，誰不怪王。騰旣爲禍始，曾無愧
懼。王若事君盡誠，何不斬送二首。王雖啓圖西
去，而四道俱進，或欲南渡洛陽，或欲東臨江左。

言之者猶應自怪，聞之者甯能不疑。王若守誠，不貳，晏然居北，在此雖有百萬之衆，終無圖彼之心。王脫信邪，棄義舉旗南指，縱無匹馬隻輪，猶欲奮空拳而爭死。朕本寡德，王已立之，百姓無知，或謂實可。若爲他所圖，則彰朕之惡。假令還爲王殺，幽辱壘粉，了無遺恨。何者？王旣以德見推，以義見舉，一朝背德舍義，便是過有所歸。本望君臣一體，若合符契，不圖今日分疎到此。古語云：越人射我，笑而道之；吾兄射我，泣而道之。

之朕既親王情如兄弟所以投筆拊膺不覺歔歔

溫仁詩集

卷全

表

魏帝納后羣臣上禮文表

臣聞軒轅乃至西陵以之作合夏后至聖塗山
于是來嬪伏惟陛下龍飛纘歷大明理運長秋
旣建陰教有主景命無窮靈基長世普天之下
莫不欣躍

西河王謝太尉表

臣聞拂羽決起力謝摩天策蹇載馳功微送日
將短翮難以陵高鶩乘無由致遠雖復建旗出

郡未追楚趙之風。捧壺入侍。徒踵金張之迹。及
天祚明德。運啓興王。六遂始遷。九鼎初定。於焉
承乏。有用當官。草靡從風。未遑克讓。常恐執轡
傾輪。操刀傷錦。

爲司徒高敖曹謝表

委水橫流。羣龍交戰。徒悲道喪。空懷主辱。雖復
見義援戈。臨危奮劒。顧慙後衄。終謝先鞭。事等
泣河。無救三川之竭。有類憂天。豈支四極之壞。

爲臨淮王謝封開府尚書令表

臣道愧山東。氣慙隴右。激水弗功。搏風無力。但以平原帶地。資緒極天。發趾自高。理翮以遠。出臨侯服。旣乏刺舉之能。入踐帝閭。又無應對之美。空復受戈清廟。推轂朱門。孝闕淚河。功慚汗海。大寶遠降。橫草未樹。顧以有涯。願言知止。

爲南陽王讓尚書表

臣聞立而託乘。乃成致遠之功。坐以運舟。遂有利涉之用。若以輕任重課。憑虛責實。雖欲自勤。終焉靡効。

爲上黨王穆讓太宰表

臣聞策蹇長途，終慚一日之致；懸縷層臺，詎任千鈞之重。固知才弱，不可自強；力微，難以企及。智小謀大，恐貽折足之憂；才輕任重，思有絕臚之悔。旣慮鑠金，固陳匪石。

爲廣陵王讓吏部尚書表

假勢風雲，非由羽翮，徒得推遷就列，僣俛當官。曾無辟雍議禮之名，詎有銅雀獻賦之敏。而政本寔繁，司會尤切，抑揚智地，用舍時流。實當年

之準的、乃一世之權衡、得其人則分職之任隆、非其才則曠官之失起、

爲安豐王延明讓國子祭酒表

臣聞寶劒未砥、猶乏切玉之功、美箭闕羽、尚無衡石之勢、况才非會稽之竹、質謝昆吾之金、至於敷教東序、流訓上庠、置樽俎、酌懸鐘、待叩必須、蘊朱藍以成彩、立規矩以爲式、垂三行於貴、游揚六藝於胄子、而臣學愧聚沙、問慙攻木、雖厯文史、不治章句、於茲曠官、青衿何仰、

爲廣陽王北征請大將表

今四郊多壘、三軍申發、率土之濱、莫敢甯晏、況
忝末屬、復董元戎、臣不盡心、誰將竭力、豈容飾
讓、苟違戎重、但以軍旅之事、實所未學、求保重
將、隨方指麾、臣請先驅、被堅督戰、若使旗鼓相
望、埃塵相接、決機兩陣之間、不辭萬死之地、脫
獨委臣專總戎旅、兵術靡常、軍機屢變、以臣當
之、必所未達、雖奉廟算、有均膠柱

上書

爲廣陽王淵上書

淵爲北道大都督，受尚書令，李崇節度時東道都督崔暹敗於白道，淵上書

邊豎構逆，以成紛梗，其所由來，非一朝也。昔皇始以移防爲重，盛簡親賢，擁麾作鎮，配以高門子弟，以死防遏，不但不廢仕宦，至乃偏得復除。當時人物，忻慕爲之。及太和在厯，僕射李冲當官任事，涼州土人，悉免廝役，豐沛舊門，仍防邊戍，自非得罪當世，莫肯與之爲伍。征鎮驅使，但

爲虞侯白直，一生推遷，不過軍主，然其往世房
分畱居京者，得上品通官，在鎮者，便爲清途所
隔，或投彼有北，以御魑魅，多復逃胡鄉，乃峻邊
兵之格，鎮人浮遊在外，皆聽流兵捉之，於是少
年不得從師長者，不得遊宦，獨爲匪人，言者流
涕，自定鼎伊洛，邊任益輕，唯底滯凡才，出爲鎮
將，轉相模習，專事聚斂，或有諸方姦吏，犯罪配
邊，爲之指蹤，過弄官府，政以賄立，莫能自改，咸
言姦吏爲此，無不切齒憎怒，及阿那瓌背恩，縱

掠竊犇命師追之十五萬衆度沙漠不日而還
邊人見此援師便自意輕中國尚書令臣崇時
卽申聞求改鎮爲州將允其願抑亦先覺朝廷
未許而高闕戍主率下失和拔陵殺之爲逆命
攻城掠地所見必誅王師屢北賊黨日盛此段
之舉指望銷平其崔暹隻輪不反臣崇與臣遂
巡復路今者相與還次雲中馬首是瞻未便西
邁將士之情莫不解體今日所慮非止西北將
恐諸鎮尋亦如此天下之事何可易量

爲廣陽王淵上書靈太后

往者元義執權、移天徙日、而徽託附、無翼而飛、
今大明反政、任寄唯重、以徽褊心、銜臣切骨、臣
以疎滯、遠離京輦、被其構阻、無所不爲、然臣昔
不在其後、自此以來、翻成陵谷、徽遂一歲八遷、
位居宰相、臣乃積年淹滯、有功不錄、自徽執政、
以來、非但抑臣而已、北征之勲、皆被擁塞、將士
告捷、終無片賞、雖爲表請、多不蒙遂、前畱元標、
據於盛樂、後被重圍、析骸易子、倒懸一隅、嬰城

二載賊散之後依階乞官徽乃盤退不允所請而徐州下邳戍主賈勳法僧叛後蹙被圍逼固守之勳比之未重乃立得州卽授開國天下之事其流一也功同賞異不平謂何又驃騎李崇北征之日啓募八州之人聽用關西之格及臣在後依此科賞復言北道征者不得同於關西定襄陵廟之至重平城守國之要鎮若計北而論功亦何負於秦楚但以嫉臣之故便欲望風排抑然其當途以來何直退勳而已但是隨臣

征者。卽便爲所嫉。統軍袁叔和曾經省訴。徽初
言有理。又聞北征。隸臣爲統。應時變色。復令臣
兄子仲顯異端訟臣。緝緝翩翩。謀相誹謗。言臣
惡者。接以恩。顏稱臣善者。卽被嫌責。甄琛曾理
臣屈。乃視之若仇讐。徐紇頗言臣短。卽待之如
親戚。又驃騎長史祖瑩昔在軍中。妄增首級。矯
亂戎行。蠹害軍府。獲罪有司。避命山澤。直以謗
臣之故。徽乃還雪其臯。臣府司馬劉敬比送降
人。旣到定州。翻然背叛。賊如決河。豈其能擁。且

以臣府參察不免身首異處、徽旣怒遷、捨其元惡、及胥徒從臣行者、莫不悚懼、頃恒州之人乞臣爲刺史、徽乃裴然言不可惻、及降戶結謀、臣頻表啓、徽乃因執言此事、及向定州、遠彼姦惡、又復論臣將有異志、翻覆如此、欲相陷沒、致令國朝遽賜遷代、賊起之由、誰使然也、徽旣優幸、任隆一世、慕勢之徒、於臣何有、是故餘人攝選車馬填門、及臣居邊、賓遊罕至、臣近北爲慮、其爲梗、是以孜孜乞赴京闕、屬流人舉斧元戎、垂

翊復從後命自安無所僂俛先聽不敢辭事及
臣出都行塵未滅已聞在後復生異議言臣將
兒自隨證爲可疑之兆忽稱此以構亂悠悠之
人復傳音響言左軍臣融右軍臣衍皆受密勅
伺察臣事徽旣用心如此臣將何以自安竊以
天步未夷國艱猶梗方伯之任於斯爲急徽昔
臨蕃乃有人譽及居端右蔑爾無聞今求出之
爲州使得申其利用徽若外從所長臣無內慮
之切脫蒙聖鑒公私幸甚

銘

鐘銘

宮商遞變、律呂相生、立號則起、從革以成、調之
必應、擊而不橫、銅盤韻響、火鳥和聲、出入成則、
明宵有數、

法信詩集

卷全

古

碑

舜廟碑

懷山不已，龍門未闢，大道御世，天下爲公，感夢
長人，明揚側陋，釐降二女，結友九男，執耜歷山，
耕夫所以讓畔，施罟雷澤，漁父於是讓川，亦旣
登庸，以之納錄九官，咸事百揆，時叙有大功於
當世，集歷數而在躬，受文祖之命，致昭華之玉，
班五瑞於羣后，禋六宗於上玄，舞干戚而遠夷
賓，弃金璧而幽靈應，青雲浮洛，榮光塞河，符瑞

必臻休祥咸萃以君人之大德爲帝王之稱首
陟方之駕遂往蒼梧之窆不歸爰自先民實存
舊廟旣緝葯房遂鎮瑤席龍駕帝服蓋依稀於
慕舜交鼓絙瑟寔髣髴於聞韶其辭曰

虹氣降靈姚墟誕聖樹陰未徙帝圖已定乃賓
四門以齊七政天眷功高民歸德盛治旣蕩蕩
化亦巍巍南風在詠西環有歸疑山永逝湘水
長遼靈宮肅肅神館微微

寒陵山寺碑

昔晉文尊周續宣於踐土齊桓霸世威著於邵
陵並道冠諸侯勲高天下衣裳會同之所兵車
交合之處寂莫消沈荒涼磨滅言談者空知其
名遙遇者不識其地然則樹銅表跡刊石記功
有道存焉可不尚與永安之季數鍾百六天災
流行人倫交喪爾朱氏旣絕彼天綱斷茲地紐
祿去王室政出私門銅馬競馳金虎亂噬九嬰
暴起十日並出破壁毀珪人物旣盡頭會箕斂
杼軸其空大丞相渤海王命世作宰惟機成務

標格千仞、崖岸萬里、運鼎阿于襟抱、納山岳於
胸懷、擁玄雲以上騰、負青天而高引、鐘鼓嘈贊、
上聞於天、旌旗繽紛、下盤於地、壯士凜以爭先、
義夫憤而競起、兵接刃於斯塲、車錯轂於此地、
轟轟隱隱、若轉石之墜高崖、硠硠磕磕、如激水
之投深谷、俄而霧捲雲除、冰離葉散、靡旗蔽日、
亂轍滿埜、楚師之敗於柏舉、新兵之退自昆陽、
以此方之、未可同日、旣考茲沃壤、建此精廬、砥
石礪金、瑩珠琢玉、經始等於佛功、制作同於造

化息心是歸，淨行攸處，神異畢臻，靈仙總萃，鳴
玉鸞以來遊，帶霓裳而至止，翔鳳紛以相嚮，飛
龍蜿而俱躍，雖復高天銷於猛炭，大地淪於積
水，固以傳之不朽，終亦記此無忘。

大覺寺碑

維天地開闢，陰陽轉運，明則有日月，幽則有鬼
神，初地遼遠，末路悠長，自始及終，從凡至聖，積
骨成山，祇劫莫數，垂衣拂石，恒河難計，及冠日
示夢蒙羅，見謁應世降神，感物開化，顏如滿月。

心若盈泉，體道獨悟，舍靈自曉，居三殿以長想，
出四門而永慮，聲色莫之留，榮位不能屈，道成
樹下，光燭天上，變化靡窮，神通無及，置須彌於
葶藶，納世界於微塵，闢慈悲之門，開仁壽之路，
拯煩惱於三塗，濟苦難於五濁，非但化及天龍，
教被人鬼，固亦福霑行鴈，道洽遊魚，但羣生無
感，獨尊罷應，雜色照爛，諸山搖動，布金沙而弗
受，建寶蓋而未留，遂上微妙之臺，永升智慧之
殿，而天人慕德，象法興靈，圖影西山，承光東壁，

主上乃據地圖，攬天鏡，乘六龍，朝萬國，牢籠宇宙，襟帶江山，道濟橫流，德昌顏厯，四門穆穆，百僚師師，乘法船以徑度，駕天輪而高舉，神功寶業，旣被無邊，鴻名懋實，方在不朽，抵掌措言，雖不盡意，執筆書事，其能已乎。

印山寺碑

自結繩運往，觀象代興，禮樂相因，詩書間出，喻是非於一指，論道德於二篇，九流之義，遂開百家之言，並作，皆以賦命有遭，隨攝養致，天壽愛

惠起於吉凶，情僞動於利害，雖改張羅之，呪未
易，釁鐘之牲，因果之業未申，感應之途猶蔽，是
以修短有命，子夏論之而未詳，報施在天，史遷
言之而未悟。大丞相渤海王膺岳瀆之靈，感辰
象之氣，直置與蘭桂齊芳，自然其珪璋比潔，加
法體備百行，智周菓象，道兼語嘿，思極天人，固
以兆云非虎，自懷公輔之德，世稱臥龍，實任王
佐之器，道足以濟天下，行足以通神明，表立人
之上，才舍廣途之大量，永安之末，時多異謀，蜂

蓋有毒豺狼反噬，穀弩臨城，抽戈犯蹕。世道交
喪，海水羣飛。旣而蒼龍入隱，白虎出見。命世有
期，匡時作宰。拯沉溺以援手，涉波瀾而濡足。懸
皦日於胸懷，起大風於襟袖。動之以仁義，行之
以忠貞。附之者影從，應之者響起。

定國寺碑

蓋兩儀交運，萬物未生。始自苦空，終於常樂。而
緣障未開，業塵猶擁。漂淪欲海，顛墜邪山。雖復
光華並於日月，術數窮於天地。有扶危定傾之

力爲濟世夷難之功，登途山而未歸，遊建水而不反，並馳於苦樂之境，皆入於生死之門。幽隱長夜，未覩山北之燭；沈迷遠路，詎見司南之機。昔日先民，雖云善誘，尚習蓋纏，未能解脫。見如八卦成象，示之以吉凶；百藥爲醫，道之以利害。衣食有業，民免饑寒之憂；水土旣平，人無墊溺之患。斯誠事周於世用，功濟於生民，不論過去之因緣，詎辨未來之果報。惟無上大覺，均悟玄微，應現託生，方便開教。聖靈之至，無復等級，威

神之力，不可思議，動三乘之駕，汎八解之流，引諸子於火宅，渡羣生於海峽，自一音輟響，雙樹潛神，智慧雖徂，象法猶在，光照金盤，言留石室，徧諸世界，咸用歸仰。

常山公主碑

啓泰微之層構，闢閭闔之重扉，據天下以爲家，苞率土而光宅，然則昆山西峙，爰有夜光，漢水東流，是生明月，公主稟靈宸極，資和天地，芬芳有性，溫潤成質，自然祕遠，若上元之隔絳河，直

置清高類姮娥之依桂樹，令淑之至，比光明於
宵燭，幽閒之盛，匹穠華於桃李，託體宮闈，而執
心撝順，婉然左辟，率禮如賓，舉華燭以宵征，動
鳴佩而晨去，致肅雍于車乘，成好合於琴瑟，立
行潔於清冰，抗志高於黃鵠，停輪表信，闔門示
禮，終能成其子姓，貽厥孫謀，而鐘漏相催，日夜
不息，川有急流，風無靜樹，奄辭身世，從宓妃於
伊洛，據館舍追帝子於瀟湘，銘曰
龍轡莫援，日車遂往，奄離形神，忽歸邱壤，祖歌

薤露出奏巫山永厝中埜終掩窮泉蕭瑟神道
荒涼墓田松檟徒列琬琰空傳

墓志銘

司徒元樹墓誌銘

昔樞電降祥，姬水成業。握八符以馭世，膺五命以會昌。欽明格於上下，光澤被於宇宙。卜年永久，歷世遐長。有文王之孫子，啓周公之苗裔。積善所及，踵武稱賢。每以辛李爲言，恒持韓白自許。殫百慮之一致，盡能事於生民。蒼蒼在上，義歸無厚。徒有東平避世之意，空懷北海自晦之情。疾非逢霧，終異啓手。銘曰：

明允篤誠，發於岐嶷，未鏤已雕，不扶而直，修禮以耕，強學爲殖，孔既歎魯，莊亦吟越，況以度思，有懷明發，翻然高舉，歸於魏闕，長路未窮，朝光已沒。

司徒祖塋墓志

自天命生商，王居徙亳，源源悲遠，枝葉繁華，祖德潤於身，聲高邦國，父行成於已，名重京師，公鍾美多福，資神積善，器局閑靈，志識開悟，口含碧鷄之辨，手握雕龍之文，門有善業，家傳慶靈。

礪金成器相遣滿籛琢玉爲寶待價連城匪直
也人實惟有道言析秋毫辭連春藻

文

閭闔門上梁祝文

維王建國，配彼太微。大君有命，高門啓扉。良辰
是簡，穆卜無違。雕梁乃架，綺翼斯飛。八龍杳杳，
九重巍巍。居宸納祐，就日垂衣。一人有慶，四海
攸歸。

樂府

白鼻騮

少年多好事，攬轡向西都。
相逢狹斜路，駐馬詣當壚。

結襪子

誰能訪故劒，會自逐前魚。
裁絀終委篋，織素空有餘。

安定侯曲

封疆在上地，鐘鼓自相和。
美人當窓舞，妖姬掩

扇歌

燉煌樂

客從遠方來，相隨歌且笑。自有燉煌樂，不減安陵調。

涼州樂歌二首

遠遊武威郡，遙望姑臧城。車馬相交錯，歌吹日縱橫。

路出玉門闕，城接龍城坂。但事絃歌樂，誰道山川遠。

擣衣

長安城中秋夜長，佳人錦石擣流黃。
香杵紋砧知近遠，傳聲遞響何淒涼。
七夕長河爛，中秋明月光。
蟾蜍塞邊絕候鴈，鴛鴦樓上望天狼。

詩

從駕幸金墉城

茲城實佳麗，飛甍自相並。
膠葛擁行風，嵒堯閼
流景，御溝屬清洛，馳道通丹屏。
湛淡水成文，參差樹交影。
長門久已閉，離宮一何靜。
細草緣玉階，高枝蔭桐井。
微微夕渚暗，肅肅暮風冷。
神行楊翠旗，天臨肅清警。
伊臣從下列，逢恩信多幸。
康衢雖已泰，弱力將安騁。

春日臨池

光風動春樹，丹霞起暮陰。
嵯峨映連壁，飄颻下散金。
徒自臨濠渚，空復撫鳴琴。
莫知流水曲，誰辨遊魚心。

詠花蝶

素蝶向林飛，紅花逐風散。
花蝶俱不息，紅素還相亂。
芬芬共襲手，歲華從可玩。
不慰行客心，遽動離居歎。

相國清河王挽歌

高門詎改轍，曲沼尚餘波。
何言吹樓下，翻成薤

露歌

溫傳詩集

卷全

本傳

溫子昇字鵬舉、自云太原人、晉大將軍嶠之後也、世居江左、祖恭之、劉義隆彭城王義康戶曹、避難歸國、家于濟陰宛句、因爲其郡縣人焉、家世寒素、父暉、兗州左將軍府長史、行濟陰郡事、子昇初受學于崔靈恩、劉蘭、精勤、以夜繼晝、晝夜不倦、長乃博覽百家、文章清婉、爲廣陽王淵賤客、在馬坊教諸奴子書、作侯山祠堂碑文、常景見而善之、故詣淵謝之、景曰、頃見溫生、淵怪

問之景曰溫生是大才士淵由是稍知之熙平
初中尉東平王匡博召辭人以充御史同時射
策者八百餘人子昇與盧仲宣孫舉等二十四
人爲高第於時預選者爭相引決匡使子昇當
之皆受屈而去舉謂人曰朝來靡旗亂轍者皆
子昇逐北遂補御史時年二十二臺中文筆皆
子昇爲之以憂去任服闋還爲朝請後李神儁
行荊州事引兼錄事參軍被徵赴省神儁表留
不遣吏部郎中李獎退表不許曰昔伯瑜之不

應留王朗所以發嘆。宜速遣赴無錫。彥雲前失
於是還員。正光末。廣陽王淵爲東北道行臺。召
爲郎中軍國文翰。皆出其手。於是才名轉盛。黃
門郎徐紇受四方表啓答之敏速。於淵獨沉思。
曰。彼有溫郎中才藻。可畏。高車破走。珍寶盈滿。
子昇取絹四十疋。及淵爲葛榮所害。子昇亦見
羈執。榮下都督和洛興與子昇舊識。以數十騎
潛送子昇。得達冀州。還京。李楷執其手曰。卿今
得免。足使夷甫慙德。自是無復宦情。閉門讀書。

厲精不已、建義初爲南主客郎中、修起居注、曾
一日不直、上黨王天穆時錄尚書事、將加捶撻、
子昇遂逃遁、天穆甚怒、奏人代之、莊帝曰、當世
才子、不過數人、豈容爲此、便相放黜、乃寢其奏、
及天穆將討邢杲、召子昇同行、子昇未敢應、天
穆謂人曰、吾欲收其才用、豈懷前忿也、今復不
來、便須南走越、北走胡耳、子昇不得已而見之、
加伏波將軍、爲行臺郎中、天穆深加賞之、元顥
入洛、天穆召子昇問曰、卽欲向京師、爲隨我北

渡對曰主上以虎牢失守。致此狼狽。元顥新入
人○情○未○安○。今○往○討○之○。必○有○征○無○戰○。王○若○克○復○京○
師○。奉○迎○大○駕○。桓○文○之○舉○也○。捨○此○北○渡○。竊○爲○大○王○
惜○之○。天○穆○善○之○。而○不○能○用○。遣○子○昇○還○洛○。顥○以○爲○
中○書○舍○人○。莊○帝○還○宮○。爲○顥○任○使○者○。多○被○廢○黜○。而○
子○昇○復○爲○舍○人○。天○穆○每○謂○子○昇○曰○。恨○不○用○卿○前○
計○。除○正○員○郎○。仍○舍○人○。及○帝○殺○爾○朱○榮○也○。子○昇○預○
謀○。當○時○。赦○詔○。子○昇○詞○也○。榮○入○內○。遇○子○昇○。把○詔○書○
問○。是○何○詔○書○。子○昇○顏○色○不○變○。曰○。勅○。榮○不○視○之○。爾○

朱兆入洛，子昇懼禍，逃匿。永熙中，爲侍讀，兼舍人、鎮南將軍、金紫光祿大夫，遷散騎常侍、中軍大將軍，後領本州大中正。蕭衍使張臯寫子昇文筆，傳於江外，衍稱之曰：曹植、陸機復生於此。士恨我辭人數窮，百六陽夏太守傅標使吐谷渾見其國主牀頭有書數卷，乃是子昇文也。濟陰王暉業嘗云：江左文人，宋有顏延之、謝靈運，梁有沈約、任昉。我子昇足以陵顏、轢謝，舍任、吐沈、楊遵彥，作文德論，以爲古今辭人皆負才遺。

行澆薄險忌。唯邢子才王元景溫子昇彬彬有德素。齊文襄王引子昇爲大將軍府諮議參軍。子昇前爲中書郎。嘗詣蕭衍客館。受國書。自以不修容止。謂人曰。詩章易作。逋峭難爲。文襄館客。元僅曰。諸人當賀。惟子昇合陳辭。子昇久怛。惛乃推陸操焉。及元僅劉思逸荀濟等作亂。文襄疑子昇知其謀。方使之作獻武王碑文。旣成。乃餓諸晉陽獄。食敝襦而死。棄尸路隅。沒其家口。太尉長史宋遊道收葬之。又爲集其文筆爲

三十五卷。子昇外恬靜，與物無競，言有準的，不妄毀譽。而內深險，事故之際，好預其間，所以終致禍敗。又撰永安記三卷。



